



ANG

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Bayan

BATUAN KAG LUTUSON ANG REHIMENG US-AQUINO KAG TIGAYUNON ANG MGA REKISITO PARA MAGSULONG PADULONG SA ESTRATEHIKONG PAGKAPATAS

Mensahe sang Komite Sentral sang PKP sa mga Pulang kumander kag hangaway sang BHB

Sa pagsaulog sang ika-42 nga anibersaryo sang pagtukod sang Bag-ong Hangaway sang Banwa (BHB) sa Marso 29, 2011, kami sa Komite Sentral sang Partido Komunista sang Pilipinas nagasaludo sa tanan nga Pulang kumander kag hangaway. Ini ang panahon para pasidunggan ang aton nga mga rebolusyonaryo nga martir kag baganihan, magtaya sang aton nga kusog kag mga kadalag-an kag liwat nga palig-unon ang aton nga desisyon nga isulong ang inaway banwa padulong sa bag-o kag mas mataas nga lebel.

Upod sang bilog nga katapuan sang Partido kag bilog nga pumuluyong Pilipino, ginasaug naton ang mga natipon nga kadalag-an sang BHB sa rebolusyonaryo nga paghimakas para sa pungsudnon nga kahilwayan kag

demokrasya batok sa imperyalismong US kag tanan nga lokal

nga manughimulos nga sahi.

Ginapanginbulahan kag ginadayaw naton ang BHB sa pagpaslaw sa Oplan Bantay Laya kag sa pag-agom sang

mapuslanon nga mga kadalag-an sa proseso sini.

Handang-handa kita kag mataas ang kumpyansa nga atubangon kag paslawon ang isa pa ka plano nga gindisenyo sang US agud supilon ang mga rebolusyonaryo nga pwersa sang pumuluyo. Ini ang Oplan Bayanihan nga ginbuhian sang bag-o nga papet nga rehimeng Aquino sang mga dalagku nga komprador kag agalon nga mayduta. Ini ginbayuan kag ginpunihan sang maayo para sa paslaw nga padihot nga tuhayon ini sa tam-an na ka dunot nga Oplan Bantay Laya. Apang ini man ang brutal nga pagpadayon sang gilayon sini nga ginsundan kag mga nauna pa nga plano halin pa sadtong panahon ni Marcos.

Bangud sa nagapadayon kag tuman nga

kasakon sang dumuluong nga monopolyo kapitalismo,

lokal nga pyudalismo kag burukrata kapitalismo, ang

malapad nga masa sang pumuluyong Pilipino nagaantos

sang pagpanghimulos kag pagpamigos nga labaw pa sangsa

nagligad kag handa nga mag-alsa

batok sa rehimeng Aquino kag sa bilog

nga nagahari nga sistema. Labi sila nga

nagakaakig kon ginapagwa sang rehimen kag sang mga

armado nga suluguon sini nga ang rebolusyonaryo nga inaway ang

kahangdanan sang pagkaatrasado, kaimulon kag iban pa nga

makahalanusbo nga kahimtangan sa pungsod.



I. Malawigan nga krisis sang pangkatilingban nga sistemang kapitalista

Walay untat ang paglala sang krisis sang pangkalibutanon nga sistema nga kapitalista. Dogmatiko nga ginauyatan sang US kag iban nga gahum nga imperyalista ang bangkarote nga pulisiya sang globalisasyong neoliberal. Gani nagalawig ang pangkalibutanon nga krisis sa ekonomiya kag nagakadto sa mas malala nga lebel. Sa pagkamatuod, ang bug-os nga kalibutan sang kapitalismo lumos sa depresyon kag kinagamo.

Padayon nga ginaatake sang mga imperyalista kag papet nga estado ang kinamatarung sang mga mamumugon, ginapanubo ang mga suhol kag ginabuhinan ang galastuhon pangkatilingban sang gubyrno. Ginahimo nila ang mga ini agud hatagan sang mas madamo nga kahigayunan ang monopolyong burgesya para sa dasigay nga akumulasyon sang kapital kag paghugakom sang ganansya paagi sa mga pagbuhin sa buhis, kontrata sa pagsuplay sa estado, liberalisasyon sa baligyaanay kag pagpangapital, pribatisasyon sang mga propyedad pangpubliko, ispekulasyon kag manipulasyon sa pinansya, deregulasyon kag denasyunalisasyon kag pagpangdambong sa ekonomiya sang mga atrasado nga pungsod.

Ang oligarkiya sa pinansya kag iban pa nga monopolyong burgesya nga responsable sa walay tupong nga pagpangdambong sa ekonomiya sa nagligad nga tatlo ka dekada kag sa subong nga malala nga krisis sa ekonomiya padayon nga nagahugakom sang superganansya sa paglamon sang pondo sang gubyrno kag pagpapas-an sang kabug-aton sang krisis sa masang anakbalhas kag mga atrasado nga pungsod.

Ang kwarta nga pangpubliko nga ginpangsalbar sa mga bangko kag mga yabi nga korporasyon gin-gamit sang mga ini agud may mapakita nga ganansya kag indi para itulod ang produksyon kag empleyo para mabatuan ang krisis kag papagsikon ang merkado. Subong nga may ginaatubang sila nga tuman kadaku nga pangpubliko nga utang kag mga depisit, ginapatuman sang mga imperyalistang gubyrno ang mga tikang nga pagkinot nga nagahalit sa mga empleyado sang gubyrno, mga serbisyong pangkatilingban kag pumuluyo sa pangkabilugan nga obligado nga magbayad sang mas mataas nga buhis kag mga balayran para sa serbisyo.

Ang krisis nga sadto ginaugat sa paglupok sang bula sa pabalay bangud sa pag-abuso sang indibidwal nga utang kag sa indi hamak nga mas malala nga pag-abuso sa pag-utang sang mga korporasyon kag mga papeles sa pangpinansya nga merkado ang subong gulpi nga nangin indi makontrol nga mga krisis sang mga imperyalista kag papet nga estado sa porma sang mga depisit kag utang pangpubliko.

Pinakabasehan sang krisis pangpinansya ang krisis sang sobra nga produksyon nga nagabayo sa bilog nga kalibutan kag nagasakop sa mga hilaw nga materyales, mala-manupaktura kag basehan nga produktong industriyal tubtob sa mga hi-tech nga produktong elektroniko. Naglab-ot na sa wala pa natupungan nga lebel ang sobra nga konsentrasyon kag sobra nga sentralisasyon sang kapital sa kamot sang monopolyong burgesya samtang nagapabilin nga pundo ang produksyon kag ginahalitan ang palangabuhian sang mga mamumugon kag masang anakbalhas kag ang

ekonomiya sang ikatatlong kalibutan.

Sa mga imperyalistang pungsod, ginapalala sang monopolyong burgesya ang pagpanghimulos kag pagpamigos sa pumuluyo. Gani ginatulod ang pumuluyo nga magbato kag ginapukaw ang sahi nga mamumugon nga maglunsar sang makisahi nga paghimakas batok sa monopolyong burgesya. Nagaigrab ang mga paghimakas sang masa sang mga mamumugon, pamatanon, kababainhan, migrante kag iban nga pumuluyo sa North America, Europe, Japan kag iban pa. Tayuyon nga nagauswag ang mga pormasyong anti-kapitalista kag anti-imperyalista.

Nagagamit ang monopolyong burgesya sang sobinismo, rasismo, panatisismo sa relihiyon, pasismo kag pagpangsutso sang gera agud pihakon kag manipulahon ang pumuluyo kag ipalayo ang pumuluyo sa pagkilala sa mga ugat sang krisis sang indi matarung nga sistema sang kapitalismo kag imperyalismo. Apang ang nagabaskog nga mga reaksyunaryo nga ilig nga sulsol sang monopolyong burgesya nagapaakig sa pumuluyo kag nagatulod sa ila nga magbato kag tukuron ang ila organisado nga kusog.

Samtang nagahiliusa pa gihapon ang mga imperyalistang pungsod kontra sa pumuluyo kag mga atrasado nga pungsod, nagapalala ang ila banggianay sa malala nga mga problema sa ekonomiya, pinansya, baligyaanay, seguridad kag iban pa. Sa magkasunod nga miting, napaslawan ang mga imperyalistang lider nga lubaron ang mga problema nga ini kag papag-unon ang pangkalibutanon nga sitwasyon. Ang mga tradisyunal nga imperyalista may madalum nga mga kontradiksyon sa mga bag-ong sulod sa kumpetisyong

pangkalibutan pareho sang China, Russia, India kag Brazil.

Ang pinakamatingkad nga mga kontradiksyon sa tunga sang mga imperyalistang pungsod kag malapad nga masa sang pumuluyo pinakalutaw sa mga atrasado nga pungsod. Ang pumuluyo nga nagaantos sang pinakamalalala nga dagway sang pagpanghimulos kag pagpamigos sang mga imperyalista kag ila mga lokal nga papet nagaalsa subong sa bilog-bilog nga mga pungsod kag rehiyon sang kalibutan. Nagasulong ang mga kahublagan masa sa anti-imperyalista kag demokratiko nga banas.

Ang subong nga malaparan nga mga pag-alsa sang masa kag armado nga rebolusyon sa South Asia, North Africa kag Middle East mga senyal sang mas dalagku pa nga mga pag-igrab. Magadangat ang mga ini sa pagtuga sang mga kundisyon para magsublak ang mga proletaryo nga rebolusyonaryo nga partido kag mga anti-imperyalista kag demokratiko nga kahublagan masa.

Sa partikular nga kaso sang Libya, ang pangkatilingban nga kinagamo nangin gera sibil sa tunga sang rehimeng Gadaffi

kag sang oposisyon nga nagawagayway sang daan nga bandera sang monarkiya. Ang mga imperyalistang gahum sa pagpanguna sang US naglunsar sang gerang agresyon kontra sa pungsudnon nga independensya sang Libya kag pumuluyo nga Libyan sa ngalan sang tawhanon nga interbensyon para kuno isalbar ang mga sibilyan. Pakuno-kuno nga ginhatag sang US ang pagpamuno sa NATO, nga sa kamatuoran ginadiriher kag ginakontrol sini.

Ang pinakaulihi nga gerang agresyon nga ginsulsulan sang US, UK kag France nagabuyagyag sa kontradiksyon sa tunga sang mga imperyalistang gahum. Ang Germany kag Russia, upod ang China, India, Brazil kag iban pa nga indi pareho kauswag nga pungsod ang kritikal sa gera kag nagpangindi nga magpartisipar diri. Natunga ang mga estado sa Arab League samtang batok sa gerang agresyon ang mga lakip sa African Union.

Nagabaskog kag nagasulong ang mga partido nga Maoista sa India, Pilipinas kag iban pa nga pungsod kag nagapamuno sa panawagan kag pagsulong sang inaway banwa. Kaalyansa

nila ang iban pa nga rebolusyonaryo nga partido kag pormasyong masa sa lain-lain nga pungsod kag sa pangkalibutanon nga lebel.

Samtang nagadugay, nagapalala kag nagapadalum ini, ang krisis sang pangkalibutanon nga sistema nga kapitalista ang nagahana nga magpa-igrab sang mas madamo pa nga imperyalistang gerang agresyon. Kundisyon man ini agud magtuhaw ang mga rebolusyonaryo nga kahublagan sa bug-os nga kalibutan pareho sa mauswagon kag atrasado nga mga pungsod.

Antes pa man mapagar ukon mapahagan-hagan sang mga imperyalistang gahum ang krisis nga nag-igrab sadtong 2008, may mga sustantibo kag rasonable nga pagtaya nga magalab-ot ini sa bag-o kag mas malala nga lebel sa 2016. Mangin madulum ang palaabuton sang rehimeng Aquino kag bug-os nga nagahari nga sistema sa panahon nga ini bangud sa padayon sini nga panikluhod sa mga pulisiya nga dikta sang mga imperyalistang gahum sa pagpanguna sang US.

II. Ang labi nga pagkagarok sang lokal nga nagaharing sistema

Sa kabug-at sang nagapalala nga krisis sang pangkalibutanon nga sistema nga kapitalista kag bangud sa atrasado nga kinaiya kag permanenteng krisis sini, labi nga nagagaruk ang nagahari nga sistema sang mga dalagku nga burgesyang komprador kag sahi nga agalon nga mayduta sa Pilipinas kag nangin mas mapanghimulos kag manugpigis. Ginakangil-aran ini sang malapad nga masa sang pumuluyo.

Nakagapos ang rehimeng Aquino sa pulisiya sang globalisasyong neoliberal sang US. Ang ginatawag sini nga Philippine Development Plan hugot nga nagasunod sa pulisiya nga ini kag nagapalala sang paglapas sa independensya pangpolitika kag pang-ekonomiya sang pumuluyo kag nagasubasta sang aton duna nga manggad kag pungsudnon nga patrimonya agud makahugakom sang ganansya ang mga dumuluong nga

bangko kag mga istablisimento sang mga dalagku nga komprador kag agalon nga mayduta pareho sang mga pamilyang Aquino kag Cojuangco.

Ang ekonomiya sang Pilipinas padayon nga ginawasak sang neoliberal nga pulisiya sang denasyunalisasyon, liberalisasyon sa baligyaanay kag pagpangapital, pribatisasyon sang mga pangpublikong propyedad kag deregulasyon. Labi ini nga ginasalig sa pag-eksport sang barato nga hilaw nga materyales kag kusog-pangabudlay, sa pagprosesong

pangre-eksport nga may manubo nga dugang-nga-balor, sa pag-empleyo sa mga call center kag sa nagapadaku nga panggwa kag lokal nga pangpublikong pautang.

Wala sang ano man nga epektibo nga pagpugong sa panggwa kag lokal nga pagpangutang sang gubyerno. Kadungan sini, may bilog nga programa ang rehimeng Aquino para dugangan ang buhis kag mga balayran sa mga serbisyong pangkatilingban.

Nagapatuman ini sang pulisiya sang pagkinot. Ginapabay-an sini nga magtimbuok ang presyo sang langis, pagkaon kag iban pa nga sandigan nga kinahanglanon. Sa malip-ot nga panahon sugong na ang pumuluyo sa rehimen bangud sa nagalala nila nga kaimulon kag pag-antos, sa kapaslawan sang rehimen nga lubaron ang ila mga sandigan nga problema kag sa pagpakabastante sini sa mga gimik kag kawalay kapuslanan. Walay untat sila nga ginainsulto sang mga palagwaon nga nagasaka kuno ang popularidad sang rehimen base sa mga gindoktor nga sarbey samtang nagasaka ang presyo sang mga pangunahon nga balaklunon.

Patay-huya nga ginasunod sang rehimeng Aquino ang pangkalibutanon nga teroristang gera sang US kag ang US Counterinsurgency Guide sa pagbalay sang kaugalingon sini nga bag-o nga internal security plan nga may katuyuan nga tiplangon ang pumuluyo kag waskon ang rebolusyonaryo nga kahublagan. Ang bag-o nga planong kampanya sang pagpangsupil-militar mabangis nga lobo nga nagapakuno-kuno nga maamo nga karnero. Nagapadayon ini sa esensya sang Oplan Bantay Laya sa walay pulos nga pagtinguha sini nga lutuson ang armado nga rebolusyonaryo nga kahublagan paagi sa walay pangira-kira nga brutal nga

paglapak sa tawhanon nga kinamatarung.

Nagabuhi ang rehimen sang mga paltik nga pangako sa pumuluyo nga kaayuhon ang pangginubverno, magahatag sang mga serbisyong pangkatilingban, pagapauswagon ang ekonomiya kag repormahon ang sektor panseguridad. Ginapaseguro sa militar ang prayoridad sa pondo sa pihak sang malapad nga korapsyon sa kubay sang mga upisyal-militar kag sa indi hamak nga mas gilayon nga kinahanglanon sang kauswagan nga pang-ekonomiya kag mga serbisyong pangkatilingban.

May mandu sa militar nga himuon nga permi nga salambiton ang mga islogan nga demagohiko agud bayuan ang anti-pumuluyo, antinasyunal kag anti-demokratiko nga karakter kag mga katuyuan sini bilang “pamaagi nga bilog nga pungsod” ukon estratehiya nga “nakasentro sa tawo” kag ang mga operasyong militar sini bilang “pag-angkon sang kalinungan”, para sa “kalinungan kag kauswagan” kag “pagrespeto sa tawhanon nga kinamatarung.”

Ang matuod-tuod, direkta nga ginadeklara sang militar nga nakapokus ini sa mga operasyong triad (singkronisado nga mga operasyon pangkombat, paniktik kag sibil-militar) agud lutuson ang mga katalagman sa seguridad sang reaksyunaryo nga estado. Ang mga operasyon nga non-combat nagaserbi pangunahon sa pagpabaskog sang lambat-paniktik kag pagpasingki sang mga operasyon pangkombat.

Ginagamit ang mga nasambit agud tiplangon ang pumuluyo, pakalainon ang mga rebolusyonaryo nga pwersa, pahulagon ang mga ahensya sang gubyerno kag mga non-government organization ukon NGO para sa kontra-rebolusyonaryo nga gera kag pagwapuhon ang imahe sang

militar agud mapatanlas ang mga operasyon pangkombat kontra sa mga rebolusyonaryo nga pwersa kag pumuluyo. Pareho sa kaso sang pagpatay sa botanist nga si Leonardo Co, walay untat ang AFP sa pagpalapnag sang disimpormasyon kag direkta nga mga kabutigan agud hinabunan ang ila mga pasista nga krimen kag paglapas sa tawhanon nga kinamatarung.

Ang mga lokal nga upisyal kag ahensya sang gubyerno kag mga NGO nga kaalyado sang rehimen ginahatagan man sang kaseguruhan sang pondo halin sa US kag iban pa nga dumuluong kag alokasyon sa badyet agud maghatag sang limos kag iban pa nga pampaumpaw nga may tuso nga katuyuan nga tiplangon ang pumuluyo kag mga komunidad sa mga prenteng gerilya para talikdan ang BHB kag pwersahon sila nga maghatag sang impormasyong paniktik para sa mga seguridad nga operasyong istrayk sang AFP kontra sa BHB.

Makahalam-ot ang rehimeng Aquino sa pagpati nga makapadayon ini nga maghari paagi sa pagpatuman sang mga pulisiya nga dikta sang US, paglikaw sa pagplastar sang tunay nga solusyon sa mga basehan nga problema nga pang-ekonomiya, pangkatilingban kag pangpulitika kag paghimo sang mga gimik kag saywar. Nagapakuno-kuno ang rehimen nga wala sini nahibal-an ang nagalapnag nga pagkangil-ad sang pumuluyo sa kapaslawan sini nga tumanon ang mga promisa nga sukton ang rehimeng Arroyo sa korapsyon kag mga paglapas sa tawhanon nga kinamatarung kag tapuson ang kaimulon sa pagdula sa korapsyon.

Ang mga basehan nga kontradiksyon sa Pilipinas padayon nga nagatalum kag nagasagrab. Ang malapad nga masang anakbalhas sang mga mamumugon kag mangunguma kag bisan ang mga nahanunga

nga saray sa katilingban dugang nga nagakangil-ad sa nagapalala nga pagpanghimulos kag pagpamigos sa ila sang dumuluong nga monopolyong kapitalismo, lokal nga pyudalismo kag burukratang kapitalismo.

Samtang indi mapahipos ang malapad nga masa sang pumuluyo, ang mga kontradiksyon sa mga

reaksyunaryo pasulit-sulit nga nagalupok sa bayolente nga pamaagi. Ang mga magkakumpitensya nga paksyong pangpulitika sang nagahari nga sahi may mga pribadong armado nga grupo kag may mga kaugalingon nga pangpulitika kag kriminal nga hubon sa sulod sang reaksyunaryong militar, pulisya kag pwersa nga paramilitar.

Labi nga makita sang pumuluyo kag sang mga karibal sang mga ara sa poder ang tuman nga pagpakaidu-ido sang rehimeng Aquino sa dumuluong nga interes, ang kawalay ikasarang kag korapsyon sini kag ang tendensya nga maggamit sang kalakasan, baliskad sa mga deklarasyon sini.

III. Mga posibilidad sa mga kundisyon sang krisis

Ang mga kundisyon sang krisis paborable para sa pagsulong sang inaway banwa halin sa estratehikong dependensiba padulong sa estratehikong pagkapatas. Husto ang Partido sa pagtalana sang banas sang pagsulong sang rebolusyonaryo nga kahublagan sa malapit nga panahon.

Katungdanan sang BHB nga isulong ang inaway banwa kag hulu-halintang nga mag-abanse agud agumon ang pungsudnon nga kahilwayan kag demokrasya nga ginahandum sang pumuluyo. Dapat paslawon ang armado nga kontra-rebolusyon kag lutuson ang plano sini nga waskon ukon madulaan sang kabilanggan ang armado nga rebolusyon kag gani idingot sa pumuluyo ang pag-agom sang pungsudnon kag pangkatilingban nga kahilwayan.

Ang Oplan Bayanihan amo man nga sapat nga Oplan Bantay Laya, nga gindekorasyunan bilang "internal peace and security plan". Ginasakdag sini ang kaugalingon sa islogan nga "pag-agom sang kalinungan" kag ginapagwa ang mga brutal nga kampanya militar sang pagpanupil bilang operasyon para sa "kalinungan kag kauswagan" agud ikomoplahe ang pagsingki sang triad nga mga operasyon pangkombat,

paniktik kag sibil-militar. Base sa US Counterinsurgency Guide 2009, sarang himuon nga sige-sige nga salambiton sang rehimeng Aquino ang kalinungan kag rekonsilyasyon kag gamiton ang pagsinugilanon pangkalinungan bilang isa sa mga inughaboy lang nga taktika ukon padihot.

Apang ngaa buhion pa liwat sa panahon nga ini ang mga pormal nga sinapol sang pagsinugilanon nga pangkalinungan sa tunga sang reaksyunaryo nga gubyerno kag sang National Democratic Front of the Philippines? Ang pagsinugilanon nga pangkalinungan pamaagi agud iproklama sang pumuluyo kag mga

rebolusyonaryo nga pwersa ang programa sang bag-ong-demokratiko nga rebolusyon kag hangkaton yadtong mga yara sa reaksyunaryo nga gubyerno nga magpakighilusa sa paglubad sa mga ugat sang gyera sibil paagi sa mga basehan nga repormang pangkatilingban, pang-ekonomiya kag pangpulitika bilang pagplastar sang basehan para sa makatarungan kag

pangmalawigan nga kalinungan.

Sa kabug-at sang krisis sang nagahari nga sistema kag sang pagkusog sang armado nga rebolusyonaryo nga kahublagan, ang rehimeng Aquino ginapahanumdom nga may ara ini siyanga mapilian nga magpakighisugot sa kalinungan sa rebolusyonaryo nga kahublagan ukon magpadayon sa paggamit sang pagsinugilanon nga pangkalinungan sa walay pulos nga padihot nga tiplangon kag paluyahon ang desisyon nga magbato sang pumuluyo kag mga rebolusyonaryo nga pwersa kag sa pagdamgo nga sila mapaampo ukon madugmok.

Ang paggamit sang kaaway sa pagsinugilanon pangkalinungan agud tiplangon ang pumuluyo

ginaunahan sang deklarasyon sang mga rebolusyonaryo nga pwersa nga ang linya para sa makatarungan kag pangmalawigan nga kalinungan wala sang kinatuhay sa linya sang rebolusyonaryo nga armado nga paghimakas sang pumuluyo para sa pungsudnon nga kahilwayan kag demokrasya. Ginpaslaw sang NDFP ang tanan nga padihot sang reaksyunaryo nga gubyerno nga ipauna ang halambalanon sang pag-untat sang inaway sa pagsinugilanon



pangkalinungan ukon ihigot ang NDFP sa mga untat-lupok nga nagapaburon ukon nagapahigad sang kakinahanglanon nga lubaron ang mga ugat sang armado nga banggianay paagi sa mga basehan nga reporma.

Ginadugangan sang rebolusyonaryo nga kahublagan ang pagtinguha nga padasigon ang pagsulong sang pagsinugilanon pangkalinungan kag nagtanyag pa gani ini sang gilayon nga pagpakig-alyansa kag untat lupok base sa malip-ot nga deklarasyon agud igiit ang pungsudnon nga kahilwayan, pasangkaron ang demokrasya, pauswagon ang ekonomiya paagi sa reporma sa duta kag pungsudnon nga industriyalisasyon kag magbalay sang mga relasyong panggwa para isulong ang kalinungan kag kauswagan.

Indi mahimo nga magpakakampante ang rehimeng Aquino sa pagpati nga indi pa masarangan sang rebolusyonaryo nga kahublagan nga pukanon ang nagahari nga sistema sa maabot nga lima ka tuig ukon madugmok, mawad-an kabilinggan ukon mapaampo sang mga padihot sang kontra-rebolusyonaryo nga armado nga pwersa ang rebolusyonaryo nga kahublagan.

May ikasarang ang rebolusyonaryo nga kahublagan masa nga pahalidon ang nagahari nga hubon nga Aquino sa gahum pareho sang pagpahalidon sa nagahari nga hubon nga Marcos kag Estrada kag sa gamayan nga pagpahalidon sa nagahari nga hubon nga Arroyo. Ang pila ka kasaypanan sa kondukta sang kahublagan masa nakahatag ligwa sa rehimen nga magmaniobra kag makapabilin gamit ang direkta nga brutalidad kag terorismo. Dapat kuhaon ang mga leksyon gikan sa kapaslanan nga pukanon ang nagahari nga hubon nga Arroyo sa pihak

sang malala sini nga pagkahamulag kag pagkaugot diri. Dapat repasuhon kag tadlungon ang mga kasaypanan agud maagom sang rebolusyonaryo nga kahublagan masa ang lubos nga potensyal halin sa paborable nga obhetibo nga kahimtangan.

Ang mga kundisyon sang krisis, ang pagbaskog sang rebolusyonaryo nga kahublagan, ang madasig nga pagkabuyagyag sang pagka-kontrapumuluyo, antinasyunal, anti-demokratiko, korap kag brutal sang rehimeng Aquino nag-abot na sa punto sa diin masarangan na sang mga rebolusyonaryo nga pwersa nga magtukod sang malapad nga nagahiliugyon nga prente kag magtuga sang kahublagan masa para ihamulag kag pahalidon ang nagahari nga hubon nga Aquino halin sa gahum sa relatibo nga malip-ot nga panahon.

Ang pagtaas sang presyo sang langis, pagkaon kag iban pa nga sandigan nga kinahanglanon senyal sang nagaporma nga pangpulitika nga unos nga subong nagahuganas na sa iban nga pungsod kag rehiyon sa kalibutan. Indi magdugay maabutan si Aquino sang madasig nga nagamakot nga mga isyu sang korapsyon sa pihak sang propaganda nga siya mismo matinlo.

Ginasukot siya indi lamang sa kapaslanan niya nga bistahon kag prisuhon ang mga Arroyo sa korapsyon kag malala nga mga paglapas sa tawhanon nga kinamatarung kundi hasta na sa pagpabaya niya sa mga krimen pang-ekonomiya nanday Eduardo Cojuangco kag Lucio Tan kag pagpabor sa ila kag sa iban pa nga nag-amot sang daku sa pondong pang-eleksyon ni Aquino sadtong 2010. Piho nga mabuyagyag man ang mga likom nga operasyon sang mga suod nga himata kag abyan ni Aquino. Ang pagpanumbalik sang “Kamag-anak Inc.” kag

ang pagtuhaw sang ginatawag nga “Kaklase at Kaibigan Inc.” nagapabaskog sa sinisismo sa mga islogang kontra-korapsyon ni Aquino.

Madugay na nga ginapabugal sang pamilyang Aquino kag mga nagasipsip diri nga sila ang nagapanguna ukon solo nga responsable sa pagpukan sa pasista nga diktadurang Marcos kag wala kuno sang papel diri ang rebolusyonaryo nga kahublagan. Ginabulag sila sang ginhugakom nila nga manggad sa nagapadayon nga nagahari nga sistema kag napaslawan sila nga makita ang mayor nga papel nga gintungdan sang rebolusyonaryo nga kahublagan masa sa pagpukan sang mga reaksyunaryo nga nagahari nga hubon kag ang pagbakud sini halin sa amo nga paggamit sang gahum sang banwa.

Agud mapatuman ang malawig na nga ginapangayo nga hustisya, nagakaigo lamang nga gamiton sang rebolusyonaryo nga kahublagan ang nagapadaku nga pwersa sini agud dulaon na ang kabutigan nga wala sang kahilabtanang ang rebolusyonaryo nga kahublagan sa pagpukan sa diktadurang Marcos kag ang mga pareho lamang sang pamilyang Aquino kag mga nagapangunyangpot diri nga nagpanginpulos sa burges nga gahum ang nagdaog sa malawigan nga banggianay sa tunga sang rebolusyon kag kontra-rebolusyon.

Sa nagsinundanay nga rehimen, nagserbi ang mga nagtraidor sa rebolusyonaryo nga kahublagan bilang mga espesyal nga ahente sang kontra-komunismo kag reaksyon kag napadyahan sila sang mga pwesto sa reaksyunaryo nga gubyrno. Igakalipay sang pumuluyo kag mga rebolusyonaryo nga pwersa kon ini nga mga traidor nga nagaikog sa rehimeng Aquino mapahalidon sa ila pwesto

kag madula ang pagpakuno-kuno sang pamilyang Aquino nga may ara ini nga eksklusibo nga kinamatarung sa gahum

sang banwa paagi sa liwat nga pagsagrab sini sa kusog kag pamaagi nga mapaaggid sa gahum sang banwa nga

nagpuhan kanday Marcos kag Estrada.

IV. Mga pangpulitika nga rekisito sa pagsulong sang inaway banwa

Liwat nga nakahiwat sang mga pormal nga sinapol ang mga panel sa negosasyon sang Government of the Philippines (GPH, anay GRP) kag sang National Democratic Front of the Philippines bangud ginbawi nga sang GPH ang indi lehitimo nga “pagsuspinde” sini sang Joint Agreement on Safety and Immunity Guarantees (JASIG) kag gindeklara naman sini nga ang Partido Komunista sang Pilipinas, Bag-ong Hangaway sang Banwa kag National Democratic Front of the Philippines indi mga teroristang organisasyon.

Apang indi kita dapat mag-ilusyon nga malapit na nga makabalay sang kasugot nga pangkalinungan ang NDFP kag ang reaksyunaryo nga gubyrno sa pihak sang optimistiko nga iskedyul nga nakasaad sa Oslo Joint Statement sadtong Pebrero 21, 2011. Nagpabatyag na



sang mga paandam ang GPH nga kon indi magsurender ang NDFP antes ang katapusan sang una nga tatlo ka tuig sang administrasyong Aquino, untaton na sang GPH ang negosasyong pangkalinungan. Ginatanya man sang GPH kag sang mga paltik nga progresibong gaway sini nga pag-abot sang amo nga tion nagmadinalag-on na ang kampanya nga pagsupil sang militar sa idalum sang Oplan Bayanihan kag indi na

kinahanglan ang negosasyong pangkalinungan.

Dapat matul-id sang publiko nga sa una nga sinapol sang pormal nga pagsinugilanon inatake sang GPH ang The Hague Joint Declaration bilang dokumento nga nagasakdag sang walay katapusan nga pagpihak kag ginpasubalian man sini ang pag-aprobar sang nagaluntad nga mga kasugot paagi sa pag-angkon sang solo nga awtoridad panggubyrno sa Pilipinas kag pagpatimaan nga dapat mag-ampo ang NDFP sa GPH. Hayagan man nga ginbawi sang GPH ang ginhiliusahan nga petsa sa Hunyo sang ikaduha nga pormal nga pagsinugilanon sang wala nagsugot ang NDFP nga liwat nga magpakig-untat-lupok sa panahon sang pagsinugilanon.

Ano man nga oras mahimo nga pauntaton sang GPH ang negosasyong pangkalinungan, gamit ang ano man sa mga madason nga pamaagi: simple nga pagpamilit sang pag-ampo sang NDFP, pagpangindi nga hilwayon ang mga

personahe nga protektado sang JASIG kag ang 350 ka bilanggong pulitikal, pagpamalabag sa mga basehan nga repormang pangkatilingban kag pang-ekonomiya, pag-upang sa kinahanglan nga mga repormang pangpulitika kag konstitusyunal kag mga pareho sini. Samtang wala sang kasugtanan nga pangkalinungan, dapat maligon nga isulong sang malapad nga masa sang pumuluyo kag

mga rebolusyonaryo nga pwersa ang inaway banwa para sa pungsudnon nga kahilwayan kag demokrasya halin sa halintang sang estratehikong dependiba padulong sa halintang sang estratehikong pagkapatas.

Preparado ang PKP sa ideolohiya, pulitika kag organisasyon kag may ikasarang ini nga pamunuan ang bag-o nga demokratiko nga rebolusyon kag isulong ang inaway banwa halin sa subong nga lebel pakadto sa bag-o kag mas mataas nga lebel. Sa proseso, ang Partido, BHB, NDFP kag tanan nga iban pa nga rebolusyonaryo nga pwersa sang pumuluyo magabaskog kag makaangkon sang ikasarang nga magpatuman sang mas dalagku pa nga mga katungdanan kag mag-agom sang mas dalagku pa nga mga kadalag-an.

Sa pagtukod sa ideolohiya, dapat seguraduhon sang Partido nga nag-agi sa malip-ot nga pagtuon sang Konstitusyon kag Programa sang Partido kag sa kaundan sang basehan nga kurso sang Partido ang tanan nga subong nga lubos nga katapu kag magkadto dayon sa pagpadasig sang basehan nga edukasyon sang mga kandidatong katapu kaangot sang pagpatuman sa mga katungdanan sa pagsulong sang inaway banwa sa masunod nga lima ka tuig.

Ang mga malawigan nga pagtuon sa ano man nga lebel ukon mga promisa sang mas mataas pa nga mga lebel sang pagtuon sa ngalan sang konsolidasyon kag dugang pa nga konsolidasyon indi dapat gamiton agud ipaiway ang promosyon sang mga kandidatong katapu pakadto sa lubos nga mga katapu sang

Partido. Dapat kita nga maggamit sang mga ginpasimple nga materyal kag pamaagi sa pagtuon nga ginbalay sang aton nga mga kaupod sa hilikuton edukasyon kag mga propagandista kag updan ini sang mga nakaimprenta nga dibuho kag iban pa nga bulig nga awdyo-biswal. Ang pagtuon sang bilog-bilog nga mga kurso Pangpartido mahimo na subong nga himuon nga mahapos paagi sa mga awdyo-biswal nga materyales.

Dapat kita nga mangin sensitibo sa kagustuhan sang mga kandidatong katapu nga mangin mga

lubos nga katapu bilang pagkilala kag talaksan sang ila pagka-nagakabagay nga mga proletaryo nga rebolusyonaryo. Dapat naton nga makahas nga padasigon ang pagrekrut sang mga kandidatong katapu halin sa kubay sang mga abanse nga aktibistang masa, nga wala nagapasulod sang bisan isa ka indi masaligan nga elemento.

Dapat seguraduhon sang mga kadre sang Partido sa lebel sang sanga kag sa mga grupo sang Partido sa sulod sang mga organisasyon masa nga ang mga kandidatong katapu mabatak sa pagkalubos nga katapu sa sulod sang panahon nga ginatalana sang Konstitusyon sang Partido para sa lain-lain nga sahi — anum ka bulan sa mga naghalin sa sahi nga mamumugon kag mangunguma kag isa ka tuig para sa mga naghalin sa sahi nga petiburgis.

Kinahanglan naton nga padakuon ang katapuan sang Partido halin sa subong nga pila ka napulo ka libo pakadto sa indi magnubo sa 250,000 sa masunod nga mas o menos lima ka tuig. Katumbas ini sang tuigan nga abereyds nga pagrekrut sang isa ka katapu sang Partido sang isa pa agud mangin katapu sang Partido. Dapat tasahon sang mga organo kag yunit sang Partido sa tanan nga lebel, halin sa sanga tubtob sa Komite

Sentral, ang katapuan sang Partido kag planuhon kon paano mapadaku ang isip sang mga subong nga katapu sang Partido sa kaugalingon nila nga mga sakop.

Mahimo lamang naton nga matuman ang amo nga target sa plano kon lubos ka pagsik kag madinalag-on naton nga mapauswag ang kahublagan masa sa kasyudaran kag kaumhan. Paagi lamang sa pagpauswag sang kahublagan masa kita magaangkon sang madalum nga bubon nga makuhaan sang mga katapu sang Partido para sa lain-lain nga rebolusyonaryo nga hilikuton kag agud magserbi bilang mga Pulang hangaway sang BHB.

Dapat kita makadeploy sang mas madamo nga katapu sang Partido halin sa kubay sang mga mamumugon kag edukadong pamatan-on agud magserbisyo sa hangaway sang banwa kag para sa hilikuton masa kag pagtukod sang mga sanga sang Partido, organisasyon masa kag organo sang gahum pangpulitika sa kaumhan. Dapat sistematiko kita nga makapadala sang mga kandidatong katapu sang Partido kag mga aktibistang masa halin sa kasyudaran agud maghikot sang pangkatilingban nga pagpanayasat kag hilikuton pangmasa sa kaumhan kag para mangin mga Pulang hangaway sang hangaway sang banwa.

Sa pagtukod sa pulitika, dapat palapnagon sang Partido ang bag-ong-demokratiko nga rebolusyon kag magtuga sang kahublagan masa paagi sa pagpukaw, pag-organisar kag pagpahulag sa masang anakbalhas sang mga mamumugon kag mangunguma kag tanan nga iban pa nga patriyotiko kag progresibo nga saray kag sektor pareho sa kasyudaran kag kaumhan.

Dapat magbaskog kag magsulong ang kahublagan masa sa kasyudaran agud atubangon ang mga nagabaga nga halambalanon nga

nagaapekto sa kabuhi sang pumuluyo, muklaton kag pahulagon ang pumuluyo kag itum-ok ang nagahari nga hubon kag ang bug-os nga nagahari nga sistema. Wala nagakulang sa matingkad nga mga isyu nga dapat ginaatubang sang kahublagan masa. Ang walay untat nga pagtaas sang presyo sang langis, ang nagapadaku nga mga galastuhan, ang lapnagon nga disempleyo, ang kawad-an sang duta kag puluy-an, ang kaimulon sa kaumhan, ang kagutuman kag paglapnag sang mga balatian kag ang madasig nga pagkabulok sang mga serbisyong pangkatilingban lunsay nagapaakig sa pumuluyo kag nagapukaw sa ila nga maglunsar sang mga aksyon pangpulitika.

Ang pinakamalahalon nga katungdanan sang kahublagan masa amo ang pagplastar sang kritikal nga pag-analisar kag pagplastar sang husto nga linya sang paghimakas batok sa nagahari nga reaksyunaryo nga hubon kag sistema kag pagpahulag sa mga pwersa sini agud lab-uton ang minilyun-milyon ka pumuluyo paagi sa epektibo nga pag-organisar kag pagpropaganda agud mahiliusa sila nga ipakigbato ang ila mga pungsudnon kag demokratiko nga handum.

Dapat padakuon kag pahulagon ang mga patriyotiko kag progresibo nga organisasyon masa. Dapat nila ikambyo ang kaakig sang pumuluyo sa nagahari nga sistema pakadto sa organisado nga rebolusyonaryo nga pwersa kag gamiton kag hangkaton ang mga pagpakuno-kuno sang subong nga rehimen nga nagarespeto ini sa mga demokratiko nga kinamatarung. Ang mga pangmasang paghimakas sa kasyudaran nagapabilin nga ligal kag depensibo kag ang katuyuan sini amo ang padakuon ang mga aksyon masa sangsa magsulod ini sa paglunsar sang mga gagmay

kag nahamulag nga mga probokatibo nga aksyon.

Apang dapat nagapataas ang lebel sang militansya. May ara kita nga manggaran nga inagihan sa pagpataas sang militansya kag pagpahulag sa masa pareho sang nahimo naton sadtong Unos sang Una nga Kwarto sang 1970 kag sa proseso sang pagpatalsik sa diktadurang Marcos sadtong 1983-86 kag sa rehimeng Estrada sadtong 1999-2001. Sa tion nga ginaatake kag ginasupil sang rehimeng Aquino ang mga aksyon protesta sang masa, malaparan nga magalsa ang pumuluyo, pareho sang nakita na sa aton kasaysayan kag sa lain-lain nga pungsod kag kontinente subong. Sa aton kasaysayan, ang mga pagpang-atake sang rehimeng Marcos kag sang masunod nga mga rehimen



nakapainit sa kaakig sang masa kag nakapahulag sa ila. Makita naton sa mga aksyon protesta sa iban nga pungsod nga sa kada ginaatake ang mga ini sang militar ukon pulis nagalapnag ang mga protestang masa kag nagasingki tubtob sa mapukan ang rehimen.

Kinahanglan ang mabaskog nga kahublagan masa sa kasyudaran agud mahamulag kag mapaluya ang nagahari nga hubon nga nakabase sa kasyudaran kag mapunggan ang ikasarang sini nga mag-deploy sang mas madamo nga pwersa militar kag pulisya kontra sa armado nga rebolusyonaryo nga kahublagan sang pumuluyo sa kaumhan.

Kon wala sang mabaskog nga ligal nga demokratiko nga kahublagan masa sa kasyudaran, makadeploy ang kaaway bisan san-o

magustuhan sini sang mas madamo nga pwersa militar kontra sa pumuluyo kag mga rebolusyonaryo nga pwersa sa mga prenteng gerilya. Tuman kakumpyansado ang rehimeng Arroyo sa pagdeploy sang mas madamo nga pwersa militar sa kaumhan bangud naghuyang kag naggamay ang kahublagan masa sa kasyudaran kag nakontrol ang kahublagan nga anti-Arroyo sa sulod sang militar.

Sa ano man nga matukod nga alyansa sang ligal nga demokratiko nga pwersa kag mga disgustado nga upisyal kag elemento sang reaksyunaryo nga militar kag pulisya, ang dapat nga panawagan amo ang pagtahud

sang mga pwersa sa sulod sang reaksyunaryo nga gubyerno sa mga demokratiko nga kinamatarung sang hilway nga pagpahayag kag pagpasugot nga magdaku ang mga protestang masa antes sila magdeklara sang pagbawi sang suporta sa nagahari nga hubon.

Ang Bag-ong Hangaway sang Banwa ang pangunahon nga organisasyon sang Partido agud pukawon, organisahon kag pahulagon ang pumuluyo diin man ini nagaopereyt sa kaumhan. Epektibo nga makalunsar sang hilikuton masa ang mga yunit sini kag maka-inisyatiba sa pagtukod sang mga organo sang gahum pangpulitika, organisasyon masa, milisya sa lokalidad kag yunit para sa pagdependa sa kaugalingon sa mga organisasyon masa. Apang ang mga responsibilidad sa pag-organisar sa masa dapat padayon na nga ipaabaga sa mga sanga sang Partido sa lokalidad kag mga organisasyon masa agud ang mga yunit sang hangaway sang banwa mag-angkon sang nagapadaku nga panahon para

sa pulitiko-militar nga paghanas kag hilikuton nga pangkombat.

Ang linya para sa hangaway sang banwa amo ang paglunsar sang maikit kag lapnagon nga pagpakig-away gerilya sa basehan sang nagapalapad kag nagapadalum nga baseng masa. Ang taga ka yunit sang BHB dapat mag-angkon sang mga depinido nga panahon para sa kombat, hilikuton pangmasa kag produksyon. Sa tion nga ara sa hilikuton nga pangkombat, dapat magtuga ukon magtukib ang mga yunit sang BHB sang mga kahigayunan para magpusa sang mga yunit sang kaaway. Dapat tayuyon nga maglunsar ang BHB sang mga taktikal nga opensiba agud makaagaw sang mga armas kag madugangan sang linibu-libo pa ang pila ka libo na nga mga Pulang hangaway kag masakop ang tanan nga distritong kongresyunal sa kaumhan sa masunod nga lima ka tuig.

Dapat itingub ang rebolusyonaryo nga armado nga paghimakas sa rebolusyon agraryo kag pagtukod sang mga rebolusyonaryo nga base. Nagapasakop kag nagasuporta lamang ang masang mangunguma sa inaway banwa kon masabat sang reporma sa duta, halin sa minimum tubtob sa maksimum nga programa sini, ang ila demokratiko nga demanda para sa duta. Mas maathag nga makita sang pumuluyo nga nagasulong ang rebolusyon sa tion nga matukod ang mga demokratiko nga organo sang gahum pangpulitika halin sa lebel sang komiteng pang-organisa sa baryo tubtob sa rebolusyonaryo nga komite sa baryo.

Sa kada halintang sang paghimakas, ang Partido, BHB kag NDFP nagaangkon sang depinido nga kusog. Apang paagi sa hilikuton sa nagahiliugyon nga prente mahimo nga dugangan, padakuon kag imaksimisa ang pwersa nga ini sa direkta ukon indi direkta nga pamaagi paagi

sa mga pwersa nga alyado. Sa pagpauswag sang nagahiliugyon nga prente, dapat magpangita sang komun nga basehan para sa pagpakigbuligay kag hatagan-konsiderasyon ang mga lehitimo nga kinamatarung kag interes sang mga pwersa nga ara sa alyansa. Apang dapat man nga mapabilin ang kahilwayan kag inisyatiba kag mangin mabinantayon sa pagtinguha sang mga reaksyunaryo sa sulod sang alyansa nga agawon ang pagpamuno ukon idiskaril ang kahublagan masa halin sa rebolusyonaryo nga banas.

Dapat naton pabaskugon ang paghiliusa sang masang anakbalhas sang mga mamumugon kag mangunguma sa sandigan nga alyansa. Dapat iangot ang sandigan nga alyansa sang masang anakbalhas sa petiburgesya sang kasyudaran agud mabug-os ang alyansa sang mga progresibong pwersa. Lampas diri, dapat iangot ang mga

progresibo nga pwersa sa pungsudnon nga burgesya agud matukod ang patriyotiko nga alyansa.

Kag lampas pa gihapon diri, permi kita handa nga magtukod sang temporaryo kag indi istable nga mga alyansa upod ang pila ka seksyon sang mga reaksyunaryo nga sahi agud ihamulag kag waskon ang poder sang pinakareaksyunaryo nga pwersa. Gani, ginahingalitan naton ang mga kontradiksyon sa kubay sang mga paksyon pangpulitika kag militar sang nagahari nga sistema. Sa pagtukod kag pagmentinar sang mga alyansa upod ang mga reaksyunaryo nga pwersa, dapat mag-angkon sang mataas nga lebel sang kamuklatan ang Partido sa pagpabilin sang kahilwayan kag inisyatiba kag pagpatalum sang rebolusyonaryo nga pagbantay kag paghalong.

Madugay na naton nga ginarespeto kag ginasuportahan ang

kinamatarung sang pumuluyo nga Moro sa pagdesisyon-sa-kaugalingon. Ginapanginpuslan naton ang ila rebolusyonaryo nga paghimakas kag ginapangipuslan man nila ang aton rebolusyonaryo nga paghimakas. Dapat naton nga ipabilin ang aton pagpakig-alyansa sa ila bangud sa benepisyo sini sa isa kag isa batok sa imperyalismong US kag sa reaksyunaryo nga gubyrno sa Manila. Dapat paslawon ang US kag mga lokal nga reaksyunaryo sa padihot nila nga idiskaril ukon waskon ang NDFP ukon MILF agud mawarik ang bilog nga pwersa sang reaksyunaryo nga armado nga pwersa batok sa ano man diri. Nagasalig kita nga magapabilin ang alyansang NDFP-MILF bangud indi masabat sang ila komun nga kaaway ang matarung nga mga demanda sang pumuluyong Pilipino kag pumuluyo nga Moro.

V.Ang estratehiya kag taktika sang inaway banwa

Dapat mangin malig-on kag maisog ang Bag-ong Hangaway sang Banwa sa pagpabakud kag sa pagtinguha nga lutuson ang Oplan Bayanihan gamit ang parehong rebolusyonaryo nga diwa nga nakapabaskog diri kag nakalutos sa 14 ka-tuig nga diktadurang Marcos kag tanan nga nagsunod nga internal nga planong panseguridad sang mga reaksyunaryo nga nagsunod kay Marcos. Dapat mas pataason pa sang BHB ang rebolusyonaryo nga kamuklatan kag ikasarang nga magbato kag pasingkion ang mga taktikal nga opensiba agud magsulong halin sa estratehikong dependsiba padulong sa estratehikong pagkapatas sa sulod sang isa ukon duha ka lima ka-tuig nga plano.

Dapat malig-on kag mapagsik nga magsunod ang BHB sa estratehikong linya sang malawigan nga inaway banwa. Ini ang paglikup sa kasyudaran halin sa kaumhan kag pagtipon sang bastante nga armado nga kusog halin diri sa malawig nga panahon tubtob maagom na sini ang ikasarang nga ilunsar ang estratehikong opensiba batok sa mga bilin sang kaaway sa kasyudaran kag agawon ang gahum pangpulitika sa pungsudnon nga lebel.

Ang estratehikong linya nagagamit sang paborable nga sosyal kag pisikal nga tereyn agud tukuron sang hulu-halintang ang hangaway sang banwa sa malawig nga panahon. Ang sosyal nga tereyn nagatumod sa makisahi nga kaundan sang linya, sa pagpasakop sa rebolusyon

sang sahi nga mangunguma nga amo ang nagabug-os sang mayorya sang populasyon kag pagsabat sa ila demokratiko nga demanda para sa duta. Ang pisikal nga tereyn nagatumod sa malapad nga lugar para sa pagdaku, deployment kag maniobra sang hangaway sang banwa.

Sa subong nga halintang sang estratehikong dependsiba para sa hangaway sang banwa, ara sa estratehikong opensiba ang mga pwersa sang kaaway bangud superyor sila sa hangaway sang banwa sa resyo nga napulo kontra sa isa sa halambalanon sang isip sang tropa, kagamitan militar kag paghanas. Apang sa taktikal nga lebel, mahimo nga mangin superyor ang hangaway sang banwa sa resyong napulo kontra sa isa kontra sa mga pwersa sang kaaway bangud ginaagom sini ang suporta sang pumuluyo kag ikasarang sini nga gamiton ang elemento sang

sorpresa batok sa ispesipiko nga mga yunit sang kaaway sa partikular nga lugar kag oras.

Dapat maglunsar ang BHB sang mahulag nga gera kag maglikaw sa mga desaysibo nga inaway nga magabutang sa peligro sa ano man nga platun ukon kumpanya. Dapat nga ilunsar lamang sini ang mga away nga pat-ud sini nga mapadaog. Kon may peligro nga mapaslawan sa isa ka desaysibo nga inaway, dapat permi ini nga mangin handa nga temporaryo nga magsaylo sang lugar.

Dapat ini nga mangin pleksible sa paggamit sang mga taktika sang konsentrasyon, dispersal kag pagsaylo. Nagakonsentra ini sang superyor nga pwersa kumpara sa ginatarget nga yunit-militar. Nagadispers ini agud dingutan ang kaaway sang ano man nga makita nga target ukon sa kada nagalunsar ini sang hilikuton pangmasa sa kubay sang pumuluyo. Nagasaylo ini agud maglikaw sa atake sang superyor nga pwersa sang kaaway kag nagamaniobra agud makaganar sang panahon ukon mas bentaha nga pusisyon.

Dapat padayon nga pauswagon ang subong nga 110 ka prenteng gerilya agud ang tanan ukon kadam-an diri mangin kusog-kumpanya nga mga prente kag magbata sang bag-o nga mga prenteng gerilya. Dapat magluntad ang indi magnubo sa 180 ka prenteng gerilya sa sulod sang lima ka tuig. Mahimo nga mag-inisyatiba ang pamunuan sang Partido kag kumand sang BHB sa isa ka prenteng gerilya nga magdeploy sang armado nga yunit pangpropaganda, iskwad ukon platun para magtukod sang bag-o nga prenteng gerilya. Dapat magbuligay ang magkaingod nga mga prenteng gerilya. Dapat mahatag sang isa ka relatibo nga mas mabaskog nga prenteng gerilya ang suporta nga kinahanglan sang isa ka mahuyang nga prenteng gerilya. Dapat man nga

makahatag ang relatibo nga mas mabaskog nga mga rehiyunal nga kumand sang suporta nga kinahanglan sang mas mahuyang nga mga rehiyunal nga kumand.

Ginaulupod ang nagatalambi nga mga prenteng gerilya agud tukuron ang mas malapad nga prente sang gyera nga makahatag-palaagyan sa mas malapad nga sakop sang kumand, koordinasyon, buligay kag maniobra. Dapat makahatag ini sang

mas madamo kag mas maayo nga mga opsyon para sa mga katuyuan nga opensibo kag dependsibo, makapadasig sang pagbaskog sang gerilya nga pagpakig-away kag makapaayo sa pagtukod sang kumpleto nga istruktura sang pwersa sang BHB halin sa rehiyunal nga lebel tubtob sa lokal nga mga gerilya kag milisyang banwa.

Dapat idiriher sang Partido ang pagtukod sang lain-lain nga lebel sang kumand agud mangin epektibo ang deployment sang mga yunit sang BHB para sa lain-lain nga katuyuan sa lain-lain nga sakop. Lakip diri ang kombatan, hilikuton masa, produksyon kag pagkolekta sang buhis. Ang anuman nga lebel sang kumand dapat mag-angkon sang kaugalingon nga pwersa nga bastante para sa seguridad kag kombatan kag dapat mag-angkon sang bastante nga tinawo kag resorsa para matungdan ang mga katungdanan sini.

Nakatipon na ang BHB sang bastante nga pwersa para makahas sini nga mapasingki ang pagpakig-away gerilya kag makasulong ini pakadto sa mas mataas nga halintang sang inaway banwa. Dapat walay untat nga maglunsar ang hangaway sang banwa sang mga taktikal nga opensiba agud makaagaw sang mga armas

kag makatukod sang bag-o nga mga yunit, dalayon nga mabag-o ang balanse sang mga pwersa kag mag-abanse halin sa halintang sang estratehikong dependsiba pakadto sa estratehikong pagkapatas. Dapat sini nga itarget ang pagtipon sang 25,000 riple agud makapadulong sa halintang sang estratehikong pagkapatas.

Dapat mangin muklat ang kada kumand kag yunit sang BHB sa nagaluntad nga armado nga pwersa sini kag makataya

kag makaplano ukon makatarget kon pila ka armas ang masarangan agawon sa sulod sang isa ka natalana nga panahon kag kon paano makalunsar sang mga taktikal nga opensiba para makaagaw sang mga armas. Dapat permi nga mangin alerto ang hangaway sang banwa sa mga kahigayunan para makalunsar sang mga taktikal nga opensiba nga may katuyuan nga makaagaw sang armas.

Ang bug-os nga sakop sang istruktura sang pwersa sang BHB, lakip na ang mga rehiyunal nga pwersa, lokal nga pwersa, milisyang banwa kag partisano sa kasyudaran dapat sige-sige nga makalunsar sang maikit kag malapnagon nga gerilya nga pagpakig-away sa basehan sang nagapalapad kag nagapadalum nga baseng masa agud makaagaw sang mga armas kag makatukod sang ikasarang ang mga platun kag kumpanya nga mangdugmok sang mga yunit sang kaaway. Ang nagapanguna nga dagway sang mga taktikal nga opensiba dapat mangin anihilatibo, nga may katuyuan nga mangdugmok sang mga yunit sang kaaway agud makaagaw sang armas kag mademoralisa ang mga pwersa sang kaaway.

Apang dapat man nga maglunsar sang mga atritibo



nga taktikal nga opensiba kag pakapuyan ang mga pwersa sang kaaway. Lakip diri ang pagpakig-away nga partisano sa kasyudaran, pagpakig-away nga isparo, operasyong isnayping, pagpakig-away gamit ang mga land mine, pag-utod sa mga linya sang gatong kag suplay sang kaaway kag pagwasak sa mga salakyan militar, ilistakan kag iban pa nga nakapermi nga instalasyon nga ginagamit kontra sa hangaway sang banwa.

Dapat hatagan sang BHB sang mga epektibo nga bunal ang ulo kag lawas sang kaaway sa kada masarangan. Dapat paduguon ang kaaway adlaw-adlaw halin sa pinakamadamo nga pilas nga mahimo ituga diri sa pungsudnon nga sakop. Sa kadugayon mapaluya ini kag mapukan.

Ang malapnagon kag masunson nga gerilya nga pagpakig-away makatuga sang dugang nga mga armas kag dugang nga mga pang-away nga yunit, makapaayo sa mga taktika kag teknika sang hangaway sang banwa kag labi nga makapataas sa epektibidad sang kumand sa tagsa ka lebel sa halambalanon sang mga pormasyon kag teritoryal nga sakop. Tugahon sini ang mga elemento sang regular nga mahulag nga pagpakig-away, labina sa tion nga ang mga kumpanya sang BHB mag-umpisa na nga magtingob ukon mas masami na nga magakoordina sa paglunsar sang mga taktikal nga opensiba. Ang bag-o kag mas mataas nga lebel sang pagpakig-away maagom sa basehan sang mga kadalag-an sa pagpakig-away gerilya.

Pulisiya naton nga mangin mabangis sa inaway pero may pahanunot sa mga tinawo sang kaaway nga nagaampo ukon nadulaan sang ikasarang nga magbato bangud sa mga samad kag aton nga nadakpan. Dapat naton ipabilin ang pulisiya nga ini agud magserbi sa pangmalawigan nga katuyuan sang pagganyat sa mga tinawo

kag yunit sang kaaway nga magdampig sa rebolusyon ukon mag-untat man lamang sa pagpakig-away sa hangaway sang banwa.

Mapadasig ang rebolusyonaryo nga armado nga paghimakas kon ang reaksyunaryo nga armado nga pwersa, pulisiya kag pwersa nga paramilitar maghalaplaag. Dapat buyukon sang mga espesyal nga yunit sang Partido kag sang mga malapit nga abyan kag paryente nga ara sa bahin sang rebolusyon ang mga upisyal kag kinaandan nga elemento sang reaksyunaryo nga armado nga pwersa nga magpagwa sang patriyotiko kag progresibo nga pusisyon sa mga isyu kag maghulag nga santo sa pungsudnon kag demokratiko nga interes sang pumuluyong Pilipino.

Dapat hugot kita nga magsunod sa mga direktiba sang Partido kag BHB sa nagakaigo nga paggamit sang mga kagamitan nga elektroniko para sa komunikasyon kag pag-istak sang impormasyon. Tuman ka episyente sang mga ini para sa positibo naton nga mga katuyuan, apang kon indi maayo nga magamit ukon makaptan tuman man ka episyente man ini nga mabuyagyag sa kaaway ang ano man nga lokasyon, palatandaan, istatus kag plano sa subong kag napunpon nga mga taktikal kag estratehiko nga impormasyon nga

mapanginpuslan sang kaaway kontra sa mga rebolusyonaryo nga pwersa. Nadulaan na kita sang mga tinawo kag rekursong bangud sa indi maayo nga paggamit sang mga kagamitan nga elektroniko kag digital (de-kompyuter). Dapat sige-sige naton nga tun-an kag ipatuman ang maayo nga pag-uyat kag paggamit sang mga ini agud makadugang sa aton bentaha.

Dapat dugang nga itingob sang BHB ang rebolusyonaryo nga armado nga paghimakas sa rebolusyon agraryo kag pagtukod sang mga rebolusyonaryo nga base. Ang

minimum nga programa sa reporma sa duta dapat dal-on sa bag-o kag mas mataas nga lebel. Sa kada masarangan, dapat ilunsar ang maksimum nga programa sa reporma sa duta, labina sa mga malapad nga lugar sa diin napi-ang ukon napalayas na sang hangaway sang banwa ang despotiko nga mga agalon nga mayduta kag ang mga dalagku nga manuglanggab sang duta. Ang mga asosasyon nga mangunguma mahimo nga magplano kag magkoordinang sang mga kontrapyudal nga kampanyang masa kag paghimakas halin sa munisipal tubtob sa inter-distrito nga lebel agud mamobilisa ang pila ka napulo ka libo nga masang mangunguma.

Sa mga prenteng gerilya, mahimo tukuron ang pila ka alyansa sa diin magamit ang mga lokal nga yunit sang reaksyunaryo nga gubyrno agud pungan ukon kontrahon ang pinakamalala nga mga operasyon militar sang kaaway. Apang mahimo nga magdaku ang mga prenteng gerilya sa punto nga masakop na nila ang tanan ukon kalabanan sang mga distritong kongresyunal sa kaumhan, mapagamay ukon madula ang gahum sang mga reaksyunaryo nga lokal nga gubyrno kag makatingob agud makatukod sang relatibo nga istable nga mga base.

Ang mga relatibo nga istable nga base mahimo lamang nga pauswagon sa tion nga nabungkag na ang mga reaksyunaryo nga organo sang gahum pangpulitika kag mabayluhan ang mga ini sang mga rebolusyonaryo nga organo sang gahum pangpulitika. Para maislan ang gahum pangpulitika sang mga reaksyunaryo kag matukod ang mga rebolusyonaryo nga organo sang gahum pangpulitika, dapat tinguhaan sang husto sang hangaway sang banwa kag rebolusyonaryo nga kahublagan masa nga palayason kag pinahan ang mga lokal nga

despotiko kag mga malain nga elemento nga nagapamigos sa pumuluyo, kag hatagan sang kahigayunan nga magbag-o yadtong mga wala sang utang nga dugo sa pumuluyo kag nagapaidalum sa mga layi sang rebolusyonaryo nga gubyrno.

Sining nagligad ginpauswag sang kaaway ang malaba nga linya sang hilikuton paniktik sa kubay sang mga espesyalisado nga ahensyang paniktik. Permi na man sini nga ginatinguhaan ang pagtukod kag pagpauswag sang lain-lain nga tipo sang lambat-paniktik sa mga lokalidad, sa pila ka institusyon, non-governmental organization kag organisasyon masa. Dapat kita nga mangin alerto sa pagluntad kag mga operasyon sang amo nga mga lambat, nga mahimo na subong nga maggamit sang cellphone kag iban pa nga hi-tech nga pamaagi sang komunikasyon sa mga nagauyat ukon nagadumala sa ila. Dapat naton nga tinguhaon sang husto nga bungkagon ang mga lambat-paniktik nga ini sang kaaway.

Ang pinakamaayo naton nga armas amo ang pagpauswag sang kamuklatan kag ikasarang sang tanan nga mga rebolusyonaryo nga pwersa kag pumuluyo nga hibal-on ang amo nga lambat kag ispesipiko nga mga ahente. Dapat aktibo nga panilagan sang hangaway sang banwa, milisya kag yunit sa pagdepensa-sa-kaugalingon sang mga organisasyon masa ang mga indi masaligan ukon suspetsado nga elemento kag maglunsar sang kaugalingon nga hilikuton paniktik. Ang ila mga nakalap nga datos dapat isumite sa mas mataas nga responsable nga mga awtoridad para sa nagakaigo nga ebalwasyon, dugang nga imbestigasyon kag kumpirmasyon antes maghimo sang nagakabagay nga mga aksyon nga may pagkilala sa husto nga proseso kag iban pa nga demokratiko nga kinamatarung.

Dapat magpadala ang hangaway sang banwa sang

mga yunit agud arestuhon para mapasakaan kaso ang mga mangdarambong, nagalapas sa tawhanon nga kinamatarung, lokal nga tirano, pinakaantisosyal nga mga kriminal nga elemento kag impormer sang kaaway. Ang mga yunit nga ini dapat handa magbato sa tion nga ang mga target nga alarestuhon armado kag makatalagam kag nagapamuno sa mga kriminal nga armado nga grupo. Upod sa mga lokal nga tirano kag pinakamalala nga mga nagapanghimulos ang mga despotiko nga agalon nga mayduta, lokal nga warlord kag yadtong nagapanglanggab sang duta, nagapangguba sa naturalisa kag nagapanakaw sa pumuluyo sang ila duna nga manggad.

Dapat kita nga magsunod sa Comprehensive Agreement on Respect for Human Rights and International Humanitarian Law sa paglaot sa mga nagalapas. Dapat indi pagpasugtan nga magpagusa sa bunga sang ila mga krimen ang mga nagapanguna nga kriminal, ila mga kahimbon kag mga nagpanginpulos sa mga dalagku kag sistematiko nga paglapas sa tawhanon nga kinamatarung kag pagpangdambong. Ang ila tinakawan nga manggad dapat maentregar sa gubyrnong banwa kag sa mga biktima. Dapat sila nga makiha sa hukmanan sang banwa kag kon mapamatud-an nga may kasalanan dapat silutan sang hangaway sang banwa.

Ang pinakaepektibo nga pamaagi para sa pumuluyo nga mapunggan ang reaksyunaryo nga gubyrno sa paghatag sang duta kag mga manggad nga mineral sa mga dumuluong nga korporasyon amo ang pagtukod sang epektibo nga kahublagan masa batok sa ila kag pagpahanugot sa hangaway sang banwa nga pi-angon kag waskon ang pagkabutang kag iban pa nga pasilidad sang mga antinasyunal kag anti-pumuluyo

nga korporasyon kag mga ahente nila.

Ang Partido, BHB, mga organisasyon masa kag gubyrnong banwa dapat masustentuhan sang mga kontribusyon sang mga nagbenepisyo halin sa reporma sa duta kag pagpataas sang suhol. Dapat makaproduksyon sa lain-lain nga pamaagi para sa benepisyo sang hangaway sang banwa, mga Pulang hangaway kag mga pamilya nila. Katungdanan sang gubyrnong banwa nga magkulekta sang buhis kag mga balayran kag mag-imponer sang mga multa agud mapondohan ang mga serbisyong pangkatilingban, operasyong administratibo kag depensa. Ang BHB ang nagaserbi nga ahensya nga tagpatuman sang pulisiya sa pagbuhis sang gubyrno sang banwa.

Dapat mag-angkon sang matalum nga kamuklatan ang BHB sa nagapataas nga lebel sang interbensyon-militar sang US base sa pulisiya sang teroristang inaway sang US, US-RP Mutual Defense Agreement, Visiting Forces Agreement, US Counterinsurgency Guide kag lain-lain pa nga tapalan, lakip na ang mga gintingob nga paghanas-militar, humanitarian mission, civic action kag mga pareho sini. Aktibo ang mga tropa sang US sa mga mapanupil nga kampanya militar bilang mga manuglaygay, manughanas kag suportang paniktik.

Samtang nagabaskog ang BHB, maekspektar ang paglunsar sang US sang hayag nga agresyon batok sa pumuluyo. Gani dapat agumon sang pumuluyong Pilipino kag mga rebolusyonaryo nga pwersa ang pakighiliusa kag suporta sang mga pumuluyo sang kalibutan batok sa mga operasyong militar sang US sa subong kag palaabuton nga lapas sa pungsudnon nga soberanya sang pumuluyong Pilipino kag teritoryal nga integridad sang Pilipinas. ~